

'n Spook in Ouma se pajamas

Storie deur Kai Tuomi

Illustrasies deur Magriet Brink en Leo Daly



Onke is vas aan die slaap in sy klein bedjie, in sy klein kamertjie, in die huis wat hy met Mamma, Pappa, Ouma en sy klein hondjie, Puppy, deel. Puppy slaap op 'n rooi kombers aan die voetenent van Onke se bed. Sy snork saggies en droom dat sy eekhorings in die park jaag.

Skielik hoor Onke 'n harde geluid en hy skrik vervaard wakker. Hy trek die kombers oor sy kop. "Ek hoop nie dit is 'n monster of 'n bangmaakspook nie. Ek hou nie van spoke nie," sê hy bewend.

KRAAK! "Daar's dit weer," sê hy, en probeer dapper klink. "Ek moet uitvind waar daardie geluid vandaan kom." Onke tel die groen plastiekflits, wat hy op sy bedkassie bêre, op en skyn met die flits in die kamer rond.

"Dink jy dis 'n spook wat so lawaai?" vra Onke vir Puppy, wat steeds vas slaap. Onke vryf oor haar kop.

HOE! HOE! Nou is daar 'n ander geluid buite.

"Is dit 'n spook?" vra Onke, en skyn met sy flits deur die venster.

'n Groot, vet bruin ding, vol vere, en met 'n geel snawel, sit op die tak buite. Onke lag en sê: "Dis nie 'n spook nie. Dis net 'n uil wat in die boom sit. Maar ek wonder waar daardie kraakgeluid vandaan kom?"



HOE! HOE! Die groot uil sprei sy vlerke en vlieg weg oor die tuin.

“Uile jag snags mui se en rotte, en dis waarom mense hulle nooit sien nie. ’n Mens is nogal gelukkig as jy ’n uil sien,” sê Onke. “Nie waar nie, Puppy?”

Maar Puppy is steeds in droomland. Onke vryf toe maar haar wollerige magie en sy snork en rol om op haar rooi kombers.

“Dalk is ek sommer net laf,” dink Onke. Maar dan sien hy iets donker en vreesaanjaend in die hoek van sy kamer. Dit lyk soos ’n groot monster met aasvoël vlerke en leeu kloue en lang tande, soos ’n vlakvark s’n.

“Is dit ’n spook?” sê hy, en skyn met sy flits in die hoek van sy kamer. Onke lag toe hy sien wat dit regtig is. “Dis net my vuil klere wat oor ’n stoel hang. Ek moes dit weggepak het, soos Mamma my gevra het. Of hoe, Puppy?” Maar Puppy slaap vas.



“Maar wat is daardie kraakgeluid wat ek netnou gehoor het?” sê Onke. *KRAAK!* Hy hoor weer die geluid en begin bewe. “Dit moet ’n spook wees,” dink hy, “en dit klink asof dit net buite my kamer rondsweef.”

Onke probeer baie dapper wees, al bewe sy knieë soos jellie. Hy loer by sy kamerdeur uit, en kyk in die donker gang af.

Maar daar is niks daar nie, net sy ouers se skoene teen die muur, en Puppy se waterbak op 'n klein matjie. Onke kruip op die mat in die gang af, verby sy ouers se slaapkamer, en loer by die kombuis in.

“Dis 'n spook!” skree hy, en skyn sy flits op 'n swart skaduwee wat langs die stoof staan. Die spook dra blou pajamas met skapies op.

“Dis mos Ouma se pajamas,” sê Onke.

“Waarom het jy Ouma se pajamas gesteel, Spook?” Onke skyn met sy flits in die spook se gesig. Dis Ouma!

“Onke,” sê Ouma, haar mond wawyd oop van skok. “Jy het my nou baie groot laat skrik. Ek het gedink jy's 'n spook.”

“Ek het gedink Ouma is 'n spook,” sê Onke en giggel. “Wat doen Ouma so laat in die aand in die kombuis?”

“Ek kon nie slaap nie,” sê Ouma, “toe kom ek kombuis toe vir 'n beker warm melk en koekies. Wil jy 'n middernaghappie saam met my geniet?” Onke glimlag en knik sy kop.

Hy en Ouma gaan sit by die kombuistafel en gesels saggies terwyl hulle heerlike, bros botterkoekies in bekere warm melk doop. Toe maak hulle 'n geroosterde toebroodjie wat hulle deel, met ham, kaas, tamatie en vars groen blaarslaai.





Toe hulle klaar geëet en gedrink het, borsel hulle vir die tweede keer daardie aand hul tande. Toe sê Onke vir Ouma goeienag en gaan terug na sy kamer toe. Toe hy die deur oopmaak, spring Puppy op en blaf.

“Puppy,” sê Onke, en vryf oor haar kop, “dis net ek. Het jy gedink ek is ’n spook?”

Puppy lek sy gesig en rol om op haar rooi kombers.

“Ek het vanaand ’n raaisel opgelos. Het jy dit geweet, Puppy?” vra Onke.

Maar Puppy het reeds opgekrul en haar oë toegemaak.

“Dit lyk na ’n goeie idee,” sê Onke. “Lekker slaap, Puppy.”

WEES KREATIEF!

- Onke se hond, Puppy, droom. Moedig jou kinders aan om ’n prent te teken van
- Puppy wat vas slaap en vra hulle dan om ’n denkbord met ’n prent daarin te
- teken om te wys waarvan Puppy droom.



'n Spook in Ouma se pajamas

Storie deur Kai Tuomi • Illustrasies deur Magriet Brink en Leo Daly



Visueel

Onke se hond, Puppy, droom. Teken 'n prent van Puppy wat vas aan die slaap is en voeg dan 'n denkborel by met 'n prent daarin om te wys waarvan Puppy droom.



Lees

Wees 'n storiespeurder! Vind woorde in die storie wat vir jou vertel dat:

- ★ Onke reeds sy tande geborsel het voor hy aan die begin van die storie gaan slaap het
- ★ Onke gedink het dat hy nie so bang sou wees as hy geweet het wat die geraas maak wat hom wakker gemaak het nie
- ★ hy bang was toe hy in die donker gang afgekyk het
- ★ hy gedink het dat die spook Ouma se pajamas dra
- ★ Puppy die hele tyd toe Onke in die kombuis was, vas aan die slaap was op Onke se bed.


Skryf

Skryf jou eie bangmaakstorie oor iets wat in die aand gebeur.



Handwerk

Wat wil jy graag as 'n middernaghappie hê? Gebruik speeldeeg of klei om 'n lekker middernaghappie vir jou te maak.



Speel toneel

Aan hoeveel verskillende maniere kan jy dink om 'n bangmaakspook te wees? Trek soos spoke aan en maak beure om mekaar bang te maak. Hoe dink jy behandel spoke mekaar? Voer dit op.

